

23. maj 2019

**2018-imut Nunatta Karsiata naatsorsuutaasa akuersissutigineqarnissaannik siunnersuut.**  
(Aningaasaqarnermut akileraartarnermullu naalakkersuisoq)

Siumumiit Nunatta Karsiata 2018-imut naatsorsuutaasa akuerineqarnissaat pillugu inatsisartunut aalajangiiffisassatut siunnersuutip siullermeerneqarnerani imaattunik oqaaseqaateqassaagut:

Qujanartumik mannakkut nunatta aningaasaqarnera aqqikkiartorpoq, suliffissaaleqineq appariartorpoq allaat piffiit ilaanni sulisussaaleqiffiulerluni, kommuunit aningaasaqarnikkut ingerlalluarput, suliffeqarfissuit Namminersorlutik oqartussanit pigineqartut aningaasaqarnikkut ingerlalluarput, aap aamma nunatsinni innuttaasut aningaasaqarnikkut atugarissaanerunissaat anguniarlugu aningaasatigut periarfissaqarnerulissaagut.

Nunatta Karsia 2018-imi IST-mi 115 mio. koruuninik sinneqartooruteqarpoq, tassani ilassutitut aningaasaliissutit ilanngullugit 152 mio. koruuninik amigartooruteqartussatut missingersuusiortoqarsimagaluarpoq, taamaalillunilu katillugit pitsanngoriaatinik 267 mio. koruuninik nikingassuteqarlutik. IS-imi sinneqartoorut 133 mio. kr.-uvoq, tassani ilassutitut aningaasaliissutit 134 mio. kr.-t ilanngullugit amigartoorutussatut missingersuusiortoqarsimagaluarpoq, taamaalillunilu katillugit nikingassutit 267 mio. kr.-ullutik.

Naatsorsuutit inerneranni ingammik Nunatta Karsiata isertitai 280 mio. kr.-nik qaffassimanerannik takutitsisuupput. Ingammik raajanut aalisakkanullu akitsuutit, katillugit 154 mio. kr.-nik qaffariaateqartut patsisaapput. Nunatsinni aningaasaqarneq ingerlalluarpoq, aalisarnermillu ingerlatsisut akitsuutit nunamullu tamarmut akileraarutitigut pisortat aningaasaqarneranni isertitaqarluartitsipput.

Siumumiit iluarisimaarparput Nunarput aningaasaqarnikkut ingerlalluarmat.

Ukiaru naatsorsuutit aappassaaneernejalerpata oqaaseqaqqikkumaaratta taamannak naatsumik oqaaseqarallarpugut. Siunnersuutillu aappassaaneernejannginnermini kukkuneruiuermut ataatsimiittitaliamit suliarineqarnissaa innersuussutigaarput.

Jens Danielsen, Siumut